

得耕堂政書

第七册

退耕堂政書卷十四目錄

奏議十四

江省續放甘井子夾荒並推放西布特哈荒務摺

遵議幣制畫一辦法摺

遵籌江省旗丁生計摺

蒙荒所提經費難歸正款片

遵擬江省裁缺人員補用辦法摺

裁缺文職請歸部選用片

遵議駐吉水師營官丁改補辦法片

依克明安公荒務竣事擇尤請獎摺

遵旨查明營商倒閉及被參各節摺

官兵在吉剿匪出力各員擇尤保獎摺

陣亡驍騎校承銓之子巡官法芬佈擊匪出力請卹獎片
江省白楊木河荒務竣事請獎摺

江省創辦中學改定兩級師範學堂並推廣女學情形摺
江省擬定鐵路附近煤礦合同片

署琿春副都統陳昭常帶印駐延片

退耕堂政書卷十四

天津徐世昌

奏議十四

江省續放甘井子夾荒並推放西布特哈荒務摺

奏爲續放甘井子段零星夾荒暨推放西布特哈荒地各數並征進押租銀兩恭摺具陳仰祈

聖鑒事竊查光緒三十二年十二月間奏報甘井子荒地告竣摺內曾已聲明其餘零星夾荒擬俟明春再行招放當經臣德全酌留員司飭令迅速辦理並飭將西布特哈附近等處一律推放茲據報稱自三十二年十二月初一日接放之日起至三十三年十一月底止共放毛荒一萬七千七百八十五晌扣七成地一萬二千四百四十九晌五畝每晌仍按七錢收押租銀八千七百一十

四兩六錢五分每兩隨征一五經費銀一千三百零七兩一錢九分七釐五毫照章自光緒三十四年起限至三十九年升科又查出熟地一萬四千一百六十九晌照章不收押租當年升科每晌按六百六十文計收進大小租錢九千三百五十一串五百四十文其西布特哈境內已經放出之地數銀兩均在其內等情呈請奏報前來臣等覆核無異除飭造具毘連細冊咨部查照並將收除各款情形另片奏明外所有甘井子段續放夾荒並堆放西布特哈荒地各緣由謹恭摺具陳伏乞

皇太后

皇上聖鑒

遵議幣制畫一辦法摺

奏爲遵議幣制畫一辦法敬陳管見恭摺仰祈

聖鑒事光緒三十三年十一月二十六日准軍機大臣電寄奉
旨現當整飭庶政幣制關係重要近來內外臣工有謂宜鑄一兩
暨五錢重十足銀圓以爲主幣一錢暨五分重九成銀圓以爲輔
幣者而主七錢二分之說者意在不用兩錢分釐名目祇須以枚
計算與他國之幣相通二說相歧莫衷一是著各督撫體察該省
官商軍民市鄉情形暨銀兩銀圓約計行用孰居多數何者宜存
何者宜廢各抒所見限三月內據實電奏以憑核定等因欽此又
於十二月初二日准軍機大臣電寄奉

旨前經降旨飭議幣制近日諸臣條議有謂若鑄十成一兩五錢
兩種之銀圓其雜質工耗虧賠甚鉅宜減成鑄造以免虧折又有
謂旣以一兩五錢兩種銀圓爲主幣必須十成足色官民出納方
能簡易無弊交涉款項亦免折算受虧儘可搭鑄九成之一錢五

分兩種小圓以其所餘補主幣工耗之虧二說孰是著卽遵照前旨速卽併案議覆等因欽此臣等查中國向無一定幣制自墨圓侵入通商口岸暫行於東南各省所謂七錢二分者不過就分量輕重言之近來各省自造龍圓藉爲抵制其輕重仍仿墨圓此僅爲自造之龍圓而不得定爲國幣也中國向係用銀之國故一切田賦釐金官俸軍餉以及洋稅賠款無不准兩核算若以七錢二分折合膠葛虧累流弊滋多且新鑄銀幣斷不敷用則必不能盡廢生銀卽必不能廢去兩錢分釐名目若謂祇須以枚計算期與他國之幣相通則俄之盧布德之馬克法之佛郎美之託臘日本之金銀圓各不相同蓋一國貨幣自有制度豈能獨仿墨圓以爲準則況中國用銀之地究多於用圓之地其謂揆之通國生計程度未能盡合者亦殊不盡然故欲畫定幣制自應鑄一兩重之銀

圓以爲主幣五錢二錢一錢重之銀圓以爲輔幣至謂一兩五錢兩種必須十足成色臣等竊以爲未可考各國幣制無十足成色者大概皆以九成爲準有謂日本鑄造金圓凡值十圓者其金圓重二錢二分二釐將銅料雜質二成扣除不計仍作足金二錢計算今我鑄銀圓每一枚亦加入雜質三分共重庫平一兩零三分殊不知日本之金圓其值銀十圓者均隨金鎊價值漲跌核計者也所謂二錢二分二釐者亦就中國輕重之分量而衡之耳若中國之銀圓明明分量一兩零三分而強名之曰十足一兩未免名實不符令人淆惑至於工火虧耗賠累甚鉅人能言之無待縷述雖國家畫一幣政不在目前小利然旣無當於各國幣制而中外之信用與否亦全視國權之操縱爲衡若拘定鑄造十足勢必爲中外各商隨鑄隨銷無從防範轉致擾亂幣政應按照各國鑄幣

公式一切以九成成色爲準至五錢一種較一兩尤爲輕便亦宜多鑄其二錢暨一錢者似宜有所限制擬不得過大幣十分之一方能通行遞算不准抑勒至奉省官商軍民市鄉情形此間旣無現銀又乏洋圓而一切用項仍是以銀計算合併聲明所有遵議幣制畫一辦法緣由是否有當理合恭摺具陳伏乞

皇太后

皇上聖鑒訓示

遵籌江省旗丁生計摺

奏爲詳陳江省旗丁生計情形並遵

旨酌籌辦法恭摺具陳仰祈

聖鑒事光緒三十三年八月二十日奉

上諭我朝以武功定天下從前各省分設駐防原爲綏靖疆域起

見迨承平既久習爲游惰坐耗口糧而生齒滋繁衣食艱窘徒恃累代養之恩不習四民謀生之業亟應另籌生計俾各自食其力著各省督撫會同各將軍都統等查明駐防旗丁數目計口授地一面仍將各項實業教育事宜勒限認真分別籌辦先由度支部迅籌實在的款以備撥發勿稍諉誤等因欽此仰見

皇太后

皇上化除畛域一視同仁之至意伏念

國家龍興遼瀋創定八旗兵制俸餉至鉅孳生日蕃江省旗丁尙武之風披靡全國豐功駿烈史不絕書自三省練軍而子弟習爲麻惰自庚子構亂而生計愈益艱難然江省旗人情形實有較內地迥乎不同者蓋內省駐防類皆聚處省城一隅旣多限於謀生遂相習爲游惰江省幅幘廣濶從前漢民稀少八旗子弟分駐各

城計除省城將軍衙門及外城各署當差人員旅進旅退不事生業外其各處散居旗丁從事農業耕鑿相安者已不乏人又或恃牧獵爲生或倚樵薪度日率皆各執一藝足以自存其呼蘭老圈地墾至十餘萬晌東興鎮鐵山包兩處從前本係奏辦屯田此尤見豐鎬起桓固無不能從事南畝者然此尙屬其自營生業者也近數年來臣德全於通肯墾務變章一事爲旗丁籌出款項五十餘萬東西布特哈則奏准酌提二成荒價爲辦理新政津貼官兵之需於省城附郭荒地凡旗丁已墾之地皆奏明撥給永遠爲業所有餘荒並減價先儘旗丁承領以勸農務至通省旗兵向多竄敗又經早於變通善後摺內將兵餉奏明改練巡防現又撥官兵津貼之款創修昂枝路凡此皆爲八旗久遠之謀實已早體聖明廣籌生計之意惟省城及各城當差人員暨無地旗戶非爲

廣籌恆業仍不足以期經久查江省地面尙多未闢閒荒應懇

天恩俯准按照各城情形酌撥地段並免收荒價以示體卹現擬將嫩江迤西省屬未經放出之荒酌留數段作爲省城無地官兵生業計每官一員撥地二方每兵一名撥地一方如有餘荒仍均勻撥給無地散丁耕種並責成各該協佐督令限期墾闢以開地之多寡定協佐之功過務收實效而後已其璦琿墨爾根兩城種地旗戶甚夥應令各該城副都統分別查明有地無地各旗丁均照省城一律辦理又東布特哈前已就荒價項下酌留二成應令該處總管亦分別查明實係無地丁戶量與荒地以興農政西布特哈仍應仿照辦理以歸畫一惟呼倫貝爾各旗丁素以牧養爲生一時勢難責令耕種應請於該處寬留牧廠劃定房基責令築室並令於畜牧一事講求孳息之法兼教以樹藝之道至東興鎮

正書卷十四
鐵山包兩處本有屯田通肯則荒務早經辦竣且旗丁半皆地戶
腴壤尤多呼蘭則原有熟地均無庸另爲籌議其瓊琿墨爾根呼
倫貝爾各城將來放荒收價時並請援照布特哈成案由荒價酌
提二成以爲辦理各項實業教育事宜之用以上各節均係查酌
情形或爲從前所已辦或爲現在所應籌總期於江省事勢適協
其宜於旗丁生計務求有濟不必多籌鉅款而實惠固已普霑矣
所有詳陳江省旗丁生計情形並遵

旨酌籌辦法各緣由理合恭摺具陳伏乞

皇太后

皇上聖鑒訓示

蒙荒所提經費難歸正款片

再准度支部咨稱黑龍江省丈放杜爾伯特蒙荒及郭爾羅斯後

旗餘荒報銷冊內所有局員薪工等項均應在一五經費內撙節動支其蒙旗押租內所提經費錢一百文仍應照數撥歸正款報部抵餉等因於上年十一月間先後咨行前來臣等伏查江省從前勘放蒙荒每晌共收押租錢四串二百文所需經費卽由二百文內動用往往因不敷開支多耗正款故臣德全於光緒三十一年會奏加收一五經費以補前款之不足而派員查勘設局放荒等事分頭辦理需用浩繁或地方礮瘠收價少而經費無多或荒段零星派員多而開支較鉅通盤籌算除將加收之一五經費撥充公用外惟有將舊日蒙旗每晌應得項下之一百文留資挹注臣等再三撙節猶苦不敷且以荒務原有之款備充荒務要需事竣仍須造冊報銷更不致稍涉虛糜所有度支部咨令照數報部抵餉一節勢難照辦應懇

正三十一
天恩俯准仍將前款照舊辦理以資彌補除咨部查照外謹附片具陳伏乞

聖鑒訓示

遵擬江省裁缺人員補用辦法摺

奏爲遵擬江省裁缺人員補用辦法並聲覆飭查各節恭摺具陳仰祈

聖鑒事竊准陸軍部咨本部核議黑龍江裁併各項官缺及改併水師營官制一摺於光緒三十三年十月十五日具奏奉旨依議欽此欽遵等因咨行前來臣等伏查原奏內開裁缺防禦各員應如何改用飭定妥章奏明辦理一節查所裁防禦人員如有擬陪奏保曾經引

見記名者擬請仍歸原班儘先補用其無候補班次者遇有佐領

升階均應按資較俸開列在前以備錄用且所裁各員原俸並未
停止現均照常供職仍可量才委派各差自無慮其向隅原奏又
開水師營撥入漢軍丁戶暨各城官莊丁壯戶口並應一律改編
造冊報部一節查本省水師營現正改編漢軍應卽造冊送部其
官莊丁戶從前原奏本係一律改爲民籍僅瓊瑋墨爾根兩處現
尙未設民官應暫歸入漢軍辦理惟各城官莊地畝諸多輻輳該
兩處荒務尙無頭緒一俟清丈竣事卽當遵造細冊報部備查原
奏又開裁缺七十六佐領除公中佐領外一律改爲世職令卽妥
擬章程一節查裁缺人員無論世襲輪管各佐領自應遵照部議
一律改爲世職同裁缺公中佐領均歸入學堂肄業惟東西兩路
布特哈各留八佐均有整頓旗務約束兵丁之責此項裁缺人員
擬遇有佐領缺出擇其學有成就明習公事者開列在前儘先挑

補其年齒過長不能向學暨不通旗務者仍留原俸以資養贍庶於變通旗制之中仍寓體恤各員之意此後襲替世職人員應請先食原俸隨時歸入學堂肄業遇缺與應挑人員一體列驗惟所留之十六佐各員暨每佐所留甲兵除俸餉外別無進款實屬瘠苦異常均擬請一律發給全分俸餉俾資辦公而示優異至江省駐紮吉林之水師營官員丁戶等既經議准併入吉林水師營管理應否改爲佐領驍騎校之處應由臣世昌會同吉林撫臣通籌核議另案奏明辦理所有遵擬裁缺人員補用章程暨聲覆飭查各緣由理合恭摺具陳伏乞

皇太后

皇上聖鑒訓示

裁缺文職請歸部選用片